

Obraćanje predsjedavajućeg Predstavničkog doma Parlamentarne skupštine BiH Šefika Džaferovića na sjednici Stalnog komiteta Parlamentarne skupštine Vijeća Evrope

Sarajevo, 22. maj 2015.

Poštovana predsjednice Parlamentarne skupštine Vijeća Evrope, gospođo Anne Brasseur, uvaženi kolega Čolak, cijenjeni ministre vanjskih poslova BiH, gospodine Crnadak, poštovani članovi Stalnog komiteta i Biroa Parlamentarne skupštine Vijeća Evrope, pozdravljam vas u ime Predstavničkog doma Parlamentarne skupštine BiH. Dobro došli u salu Predstavničkog doma Parlamentarne skupštine BiH koju mi zovemo bijela sala, i želim uspješan rad Stalnog komiteta Parlamentarne skupštine Vijeća Evrope.

Poštovane dame i gospodo, ja želim odavde da vam poručim da će BiH učiniti sve što je potrebno da učini, uložiće maksimalne napore kako bi opravdala ovo povjerenje i što uspješnije predsjedavala Komitetom ministara Vijeća Evrope u narednih šest mjeseci. BiH će ispuniti svoje obaveze koje su navedene u Agendi koja je predviđena za šestomjesečno predsjedavanje BiH i ja u to nimalo ne sumnjam. Ali, ovaj događaj i ovo predsjedavanje za BiH je nešto mnogo više od samog predsjedavanja. Kao što je istaknuto, ovo je i prilika za BiH. Ovo je prilika da se BiH pokrene iz stanja zastoja. BiH je država koja je do 2006.godine, obavila značajne reforme i na osnovu tih reformi, stala na tračnice evropskog i NATO puta. Od 2006.godine pa na ovamo, nažalost u BiH se bilježi zastoj, a u proteklom mandatu su neke stvari krenule i unazad jer su neke reforme devastirane. Ja sam pomenuo Zakon o sukobu interesa, postoje dakle, i drugi zakoni.

Ovo je prilika da BiH krene naprijed. BiH u ovom trenutku treba odlučniju ulogu međunarodne zajednice u procesima u BiH sa jedne strane, i ozbiljnu i odgovornu politiku unutar BiH. Spoj toga dvoga, može da pokrene BiH naprijed. U posljednje vrijeme imamo znake odlučnije uloge međunarodne zajednice u procesima u BiH. Imamo Njemačko-britansku inicijativu koja je postala Inicijativa EU, koja je pomognuta i od strane SAD-a i drugih naših prijatelja u svijetu. To je Inicijativa koja mijenja red prioriteta kada je u pitanju evropski put BiH, to je Inicijativa koja će dovesti, evo za nekoliko dana do stupanja na snagu Sporazuma o stabilizaciji i pridruživanju sa EU. To je Inicijativa koja će nakon što se provedu određene početne reforme dovesti BiH u situaciju da postane kredibilan kandidat za članstvo u EU. Mi vidimo dakle, znake jedne odlučnije uloge međunarodne zajednice u BiH i ja pozivam i Vijeće Evrope da ima odlučniju ulogu kada su u pitanju procesi u BiH.

S druge strane, potrebna je ozbiljna i odgovorna vlast u BiH, vlast koja će se truditi da vodi dijalog, da sa političke scene u BiH ukloni huškašku, remetilačku retoriku, svađalačku retoriku. Umjesto takve retorike, na scenu u BiH mora stupiti

dijalog, razgovor i uporno traganje za rješenjima. Čini mi se da smo nakon prošlogodišnjih Općih izbora, nakon što smo relativno brzo za bosanskohercegovačke prilike implementirali rezultate izbora, na dobrom putu da ostvarimo ovaj standard koji se odnosi na ozbiljnu i odgovornu vlast. Uspjeli smo kada je u pitanju evo recimo Vijeće Evrope da nakon osam godina, kao što stalno ističe uvažena predsjednica Parlamentarne skupštine Vijeća Evrope gospođa Brasseur, formiramo delegaciju BiH u Parlamentarnoj skupštini Vijeća Evrope i odredimo njeno vođstvo, kao i druge delegacije. Uspjeli smo da riješimo pitanje koje nam je prijeto ovdje u BiH, a vezano je za Manival. Izbjegli smo da BiH dođe na crnu listu.

Ja sam uvjeren da u BiH možemo da uradimo još puno toga i sve ono što je potrebno, kako bi država konačno krenula svojim evropskim i euroatlanskim sigurnosnim putem. Ovo je jedna dodatna prilika za BiH. U to ime ja vam još jedanput želim dobrodošlicu u BiH, u Parlamentarnu skupštinu BiH i želim uspješan rad.

Hvala vam. (kraj)